

नेपालय् २५ दँ जिगु लुमन्ति



सु
व
र्ण
र
ज
त
उ
त्स
व

मा. गुणवती

नेपालय् २५ दै जिगु लुमन्ति



मा. गुणवती

प्रकाशक-

धर्मकीर्ति विहार

श्रीषः, नःषः,

काठमाडौं, नेपाल

फोन - २-२४५६५

बुद्ध सं. २५३१

वि. सं. २०४४

ने. सं. ११०८

ई. सं. १९८७

प्रथम संस्करण १५०० प्रति

मुद्रक-

नेपाल प्रेस

शुक्रपथ, काठमाडौं ।

फोन- २२१०३२

नेपालय् २५ दँ

जिगु लुमन्ति

मा. गुणवती प्रव्रजित जुया बिज्यागु ५० दँ

दुगु, बस्पोल नेपाः बिज्यागु २५ दँ दुगु

व बस्पोलया ६४ गूगु जन्मदिंया

लसताय् धर्मकीर्ति विहारपाखें

न्यायकूगु सुवर्ण रजत उत्सवया

उपलक्षय्य प्रकाशित

— २०८८ —



Dhamma.Digital

वर्मायाम्ह

मा. गुणवती गुरुमां

प्रब्रज्या जुया विज्यागु ५० दँ दुगु,

नेपाः विज्यागु २५ दँ दुगु

व वस्पोलया ६४ क्यंगु दँ जन्मदिंया

लसताय्

प्रकाशित धुगु सफू धर्मदान याना

वस्पोलया दीर्घायु, सुस्वास्थ्य व

सफलताया दुनुगलंनिसें आशिका

याना च्वना ।

धर्मकीर्ति विहारया

उपासक पुचः

प्रकाशकीय

थ्व सफू दो. गुणवती वा मा. गुणवती गुरुमांया गृह त्याग याना अनगारिका प्रव्रज्या जुया बिज्यागु ५० दै दुगु, थःगु देश बर्मा तोता धर्म प्रचारखा निर्मित नेपाः विज्याना नेपाःया दुःख सुख भोग याना नेपाःले थःम्हं फुथे धर्म प्रचारया ज्या याना च्वना बिज्यागु २५ वर्ष दुगु व जन्म वर्ष ६४ दै दुगुया उपलक्ष कया धर्मकीर्ति विहारयापाखें न्याय्का च्वंगु रजत जयन्ति, सुवर्ण जयन्तिया उपलक्षे छिकपिनि न्ह्योने पिदना च्वंगु खः ।

वस्पोलयात जि दो. गुणवती व मा. गुणवती धका निगू नां कया घया च्वना, कारण छाया घाःसा वस्पोलया घात्थेयागु नां ला गुणवती जक खः । तर बर्माया शिष्टाचार हिसावं अथे गुणवती धका जक नां कया सःतूगु यदि बर्मीतय्सं ताल घाःसा वस्पोलपिसं थ्वीका बिज्याई-कीसं मागुण गुरुमांयात अपमान याना तल धका । उकिं नांया न्ह्योने मिसापि जूसा गुण वृद्धि व आयू वृद्धिया हिसावं मा, अनं च्वे दो धका आदर सूचक शब्द तय् माः । यदि मिजपिं जूसा कुः वा ऊ घयागु गुण, वर्ष हिसावं तय् हे माः ।

आः मागुण गुरुमांयात बर्माया हिसावं ला मा जक तयां मगात—आयू नं ६४ दै दत्त, गुणवाचक नं यक्व दत्त ।

त्यागी जूगु हे ५० दँ दय् धुं कुवले दो. गुणवती धंगु शब्द हे प्रयोग याये माल । उकिं कीसं प्रचलितरूपं सिया च्वंगु मागुणवती वा मागुण गुरुमां धयागु वर्माया हिसावं आः वस्पोलयात दो. गुणवती धाय् माःगु अवस्थाय् थ्यन ।

लय्ताय् बहःगु खँ—वस्पोल छम्ह वर्माय् हे जन्म जूम्ह सकलि बर्मी जुया नं कीगु नेपाः देशे दुःख सुख सहयाना २५ दँ मच्छि च्वना विज्यागुलीं थौं की वस्पोल नेपाःले च्वना धर्म प्रचार याना च्वना विज्यागु नीन्यादँ दुगु रजत जयन्ति माने याय् दुगु कीया निर्मित तःधंगु छगू लय्ताय् बहःगु खँ खः ।

कारण विदेशे च्वने धयागु तसकं थाकु । व नं बुद्ध धर्म कः कः धाया च्वंगु देशे च्वम्ह की बुद्ध धर्म बुलुस्य च्वंगु देशे च्वने माःगु । उकिं वस्पोलं थ्व नीन्यादँया बिचे यक्व सह याना विज्यानातिनि २५ दँय् थ्यंवल धयागु कीसं धाय् फु ।

अथे हे छम्ह विदेशीयात २५ दँ मयाक तक्क कीथाय् तया सन्तोष याना तय् फु धयागु कीगु नं ला चीधंगु प्रयास मखु धाय् मास्ते वो । कारण कीसं नं वस्पोलयात वोगु अनेक समस्या यात समाधान याना बी फया नं खः धाय् मास्ति वो । वस्पोल २५ दँ मच्छि नेपाःले च्वना विज्यासां वस्पोल थौंतक्क नं सकलिम्ह बर्मी हे तिनि अथे धयागु मानि नेपाःया नागरिक वस्पोल मखुनि । उकिं वस्पोलया निर्मित

पासपोर्टं, भिसाया निर्मित्त अनेक थाकुगु व लय्लय् गुलि गुलि
 घेबा पुले माःगु अनेक समस्या वय् धुंकल । तर थौं की
 नेपाः सरकारया सहयोगं व वर्मी दूतावासया प्रयासं भचा
 अःपुक च्वने दया च्वन । वस्पोल न्हापा छक तसकं मफय् नं
 धुंकल अवले नं छलपोल छिकपिं दातापिनिगु अनेक सहयोग-
 द्वारा आपालं मेहनत यानातिनि स्वास्थ्य लाभ याके फुगु
 धाःसां अपो खँ ज्वी मखु । उकिं वस्पोलया सुवर्णं जयन्ति व
 रजत जयन्तियात की सकलें नेपाःमिपिं तसकं लय्लय् तायाः
 न्यायकेथाय् दु ।

थ्व सफू भाजु वरदेश व मदनरत्न पिनीपाखें आपालं
 ग्वाहाली दुगुलिं याकनं पिदंगु खः । नापं गुरुकापी सारे
 याय्गुली मय्जु रजनी बज्राचार्ययापाखें नं ग्वाहाली प्राप्त
 जूगु दु ।

उकिं मागुण गुरुमांयात २५ दै पुलावंक च्वने फय्क
 ग्वाहाली बियाच्चंपिं दातापिन्त व थ्व सफू पिदनेत ग्वाहाली
 ब्यूरिपिं प्रमुख सकल उपासक उपासिकापिन्त धन्यवाद व
 आशिर्वाद सहित वस्पोलया प्रब्रज्या वर्ष ७५ दँया वजीर
 जयन्ति व नेपाःले च्वना विज्यागु ५० दै पूर्वंगुया सुवर्णं
 जयन्ति समेतं कीसं हानं लय्लय् ताया हने फय्मा धयागु
 कामना याना ।

— धम्मवती

पुष २३, २०४४

धर्मकीर्ति विहार, श्रीघः



अनगारिका मा. गुणवतीया संक्षिप्त जीवनी

दो. गुणवती (मा. गुण गुरुमाँ) या जन्म सन् १९२४
या दिसेम्बर महिनाय् बर्माया मुदौ राज्यया कोपरां घैगु
गामय् जूगु खः । वस्पोलया वौया नां उ. मे व माँया नां दो
अे त्येँ खः ।

वस्पोल १२ दँ दुबले सन् १९३६ या मे महिनाय्
मोलमिन शहरया भगुं च्याउँ विहारे गुरुमाँपि दो. केसा व
दो वंसाचारीपिनीपाखें अनगारिका प्रव्रज्या ग्रहण याना
विज्यात । वस्पोलया चतुपच्चय दातापि बाज्या ऊ. न्यं, निनी
दो पयाम्य व तता दो. मालायिपि जुया दित ।

प्यदें तक्क वस्पोल गुरुमाँपिन्के बुद्ध धर्मया प्रारम्भीक
शिक्षा अध्ययन धुंका सन् १९४० सालय् सतिपट्टान ध्यान
गुरुमाँ जुया विज्याम्ह दो. कुशलाचारी याथाय् च्वं विज्यात ।
अन नं बुद्ध धर्मया अध्ययन व ध्यान भावनाया अभ्यास धुंका
सन् १९४९ सं बुद्ध धर्मया उच्च शिक्षाया लागी नां जाःगु
मोलमिनया खेमाराम विहारे विज्यात । अन वस्पोल विहारया
प्रमुख गुरुमाँ दो. पञ्चाचारीया अन्तेबासी जुया विज्यात ।
थन विहारे अध्ययन याना वस्पोलं धर्मया उच्च परीक्षा

(२)

‘धम्माचरीय’ पूर्वका बिज्यागु खः । थन हे वस्पोलं धम्मवती गुरुमाँ नाप लाना बिज्याःगु खः, धम्मवती गुरुमाँनं अन हे अध्ययन याना बिज्याःगु खः ।

मा. गुणवती गुरुमाँनं बर्माय् बुद्ध धर्मया विभिन्न परीक्षात पास याना बिज्याःगु दु—

१. मोलमिन देशया सुधम्माचार प्रथम वर्ष ।
२. मुदों देशया शासनपाल प्रथम वर्ष ।
३. सुवर्णभूमि देशया पारगू परीक्षाया महावेय्या-करणिक ।
४. बर्मा सरकारं संचालित पथमप्यं परीक्षाया प्रथम अङ्के ।
५. पथमा ल्हा ।
६. पथम अचि ।
७. पालि तक्षशिला धम्माचरीया परीक्षा पास याना गुरु ज्वी योग्य जुल घैगु शासन धज्ज धम्माचरिय महाअच्यो घयागु पदवि ।

वस्पोलं विभिन्न गुरुपिन्के विद्या अध्ययन याना बिज्याःगु दु—

१. मोलमिन देशया पालि तक्षशिला विहारया ऊ. सूरियाभिवंश ।
२. खेमाराम विहारया प्रमुख दो. पञ्जाचारी गुरुमाँ ।
३. सुवर्णभूमि देशया पिटकत्तय पारगू ऊ. सुवर्णजोति ।
४. सगायङ्ग देशया पट्टान गुरु ऊ. इन्दक आदि ।

वस्पोल सन् १६६३ या सेप्टेम्बर महिनाया १६
तारिख खुन्दु नेपाःया 'योःम्ह म्हात्थ' शासनधज्ज धम्माचरिया
धम्मबती नापं नेपाः बिज्याःगु खः ।

वस्पोल नेपाः बिज्याःगु २४ दँ फुना २५ दँ वयन ।
२४ दँया दुने वस्पोलं नेपाःलय् बुद्ध शासनया उन्नतिया लागि
थक्को ग्वाहाली याना बिज्यात । न्हाबल्ले मुसु मुसु न्हिला
बत्सी मचासे सकसित्तं उलि हे मैत्री-करुणा तथा च्वने फुगु
वस्पोलया गुण खः । वस्पोलया बारे न्हावको हे धाःसां कम
हे जक ज्बी । वस्पोलयात छी सकस्यान बांलाक हे म्हात्थ ।

ध्वहे दँ — वस्पोल अनगारिका जुया बिज्याःगु ५० दँ
पूर्वंगु वर्षे नँ खः । मेकथं धाःसा वस्पोलया ५० गूगु वर्षावास
पूर्वंगु दँ खः ।

Dhamma Digital

मा. गुणवती व नेपाः

— धम्मवती

मागुण गुरुमां छम्ह वर्याम्ह गुरुमां खः । अथेसां थौं
छम्ह नेपाःयाम्ह सकलिम्ह नेपाःमिथेंतुं गथे जू वोगु स्यूला ?

जि छम्ह नेपाःया म्हाय्मचा खः अथे नं नेपाःले
मिसातेत तसकं कोथुना तःगु समाज खना जन्मनिसें वाक्कि
वःगु सस्कार ज्वना ब्याम्ह धाःसां ज्यू ।

जि नेपाले राणा शासनया पाले जन्म जूम्ह खः ।
अबले ला फन हे मिसातेत कोथुना तःगु जक मखु मिसातेत
(प्राण) ज्यू हे मद्दुपि समान याना तःगु जमाना खः ।

थ्व धयागु मानि भात सित धाय्वं मिसातेत नं म्वाः
म्वाः हे उना छोइगु अवस्था व मिसातेसं आखः ब्वंसा रन्दि
ज्वी वोक्सी ज्वी धका भाःपा च्वनीगु व करपिसं नं आखः
ब्वंम्ह मिसा खनकि वोक्सी व रन्दि ज्वीत ब्वन धका गिजे
याइगु जमाना खः ।

तर जिमि मां थुकिया विरोधीम्ह खः । म्हाय्यात नं
आखः ब्वंक्य माः, मिसात धयापि मिज्या नोकर जक याय्
यंक्यगु मखु धैगु भावना दुम्ह खः । उकिं जित पूज्य बुद्धघोष
भन्तेयाथाय् जिमी म्हाय्यात आखः स्यनाब्यु धका लः ल्हाय्
यंकल ।

वस्पोलं नं दच्छति छु आखः ब्वंकल वस्पोल हे
आखः ब्वने मानि बर्मा बने धका न्हापा रुद्रराज आः सुदस्सन
भन्ते ब्वना बर्मा बिज्याय्त कुसिनगरे विज्यात ।

उकि जिमी माँ-म्ह्याय् निम्हसिया व पासापिनि साप
नुग मछिन आखः ब्वने मखना ।

अवले हे बर्मायाम्ह धम्मबुद्ध भन्ते धयाम्ह बिज्यात ।
वस्पोल नेपालि व नेवा भाय् मसः अथेसां पूज्य बुद्धघोष भन्ते
नं पालि स्यना तःगुलि वस्पोल नाप जि पालि भासं थःत
माःगु छुं खँ प्वकेफु । वस्पोलं कना बिज्याःगु बाखँ व छुं खँ
मेपिन्त नेपाल भासं अनुवाद याये फु ।

अवले वस्पोलं न्यना बिज्यात, छिमिथाय् नेपाले छु
दुःख दु ? जि अवले याक म्ह्याय् धका माँ-वौ दाजु-किजां
योत्थे तयातःम्ह जुया मेगु दुःख जि छुं मस्यु केवल बुद्ध धर्मया
आखः ब्वने मखंगु छगू हे जक दुःख धका स्यु । उकि जित मेगु
दुःख छुं मद्दु केवल बुद्ध धर्म ब्वने मद्दुगु छगू हे जक दुःख दु
धका उत्तर बिया ।

उकि वस्पोलं जित आपालं दया वना घोर जङ्गल
आसामं हे जित बर्मा यंका बिज्यात । जि बर्मा जेले लात
पास्पोर्ट मद्दुगुलि ! अनं मुक्त जुया जित मोलमिन देशे तय्
यंकल अन खेमाराम धयागु छगू सलंसः अनगारिकापि बुद्ध धर्म
अध्ययन याना च्वंगु विहार दु । अन जि थ्यन । अन जि गथे
थ्यन धयागु व वनावले गुलि दुःख जुल धयागु खँ ला योम्ह
म्ह्याय् सफूलि उल्लेख जुया च्वंगु दु ।

(६)

अन आखः ब्वनेगु धयागु किताप स्वया श्वीकायंकां जक मगा फुक्क हे कितापे च्वथें मने व म्हुति कथस्त वय्क्यमा । उकिं न्हिने न्हिने गुरुं स्यना व्यूगु आखः ब्वनेगु बहनि १०-११ बजे तक्क कथस्त घोके याना च्वनेमा । अथे बहनिसिया १०-११ बजे मजूवं न्ह्यो वय्का च्वंगु गुरुपिसं खनकि कथि नं दाइतिनि उलि जक नं मखुनि एक घण्टा कन्हे खुनु घाय् पूवने मालिगु दण्ड नं बी तिनि । उकिं बहनि आखः घोके यायेबले न्ह्यो वई थें च्वनकि उगू थुगू खँ छगू निगू ल्हाना छले याये माः ।

अवले नेपाःया विषय खँ ज्वी — जिमीथाय् नेपाःले मिसातेत साप हे कोथुना तःगु दु । मिसातेत ला ज्यू दुपि हे भाःमप्यु । म्वाः म्वाः सत्य छोया धका उना छोइगु आदि खँ कनेवले अन च्वंपि साप आश्चर्य चाइगु । गुलिसिनं गिजे याइगु मिथ्या दृष्टित का छिपि धका ! गुलिसिनं साप दया भाब तथा खँ लहाइगु — आम बान्हि मदेका छोय्माल का, इमित उपदेश बिया व मिथ्या दृष्टि हटे याये मालका धका खँ ज्वी ।

अवले धाय् — उकिं जि नं थन च्वना बुद्धया सम्यक् ज्ञान सयेका वने, छलपोलपिनं छम्ह निम्ह जिमीथाय् नेपाः विज्याना दुःखसिया सां अजापित मिथ्या दृष्टि हते ज्वीगु बाखँ कना विज्याहुं ।

छलपोलपिनि देश वर्माय् धका मिसा मिजं बराबर ! घात्थें ला मिसापि हे भाग्यमानि । तर छुयाय् जिमी नेपाः देशे मिसाते साप दुःख, थःगु छँ तोता कपिनी छँय् च्ववनेमा

आखः मसः, थःत दुःख जूसा थः माँ-बौयात चिट्टी छपौ हे
 च्वय् मसः । मभिपिं भात माजु-बाजुपिन्थाय् लावनकि
 साप दुःख । धर्म नं छुं सीका तःगु मडु । उकिं नेपाःले धर्म
 प्रचार यायेत छलपोलपिनं छम्ह निम्ह बिज्याहुँ धका न्ह्यावलें
 न्ह्याम्हं पासापिन्त धाय्गु खः । तर मेपिं पासापिसं गुलिसिनं
 अजागु देशे नं वनेगुला छहे नेपाः वने म्बाल, थन हे नागरिक
 जुया च्वं धका जित हे अन सालेगु स्वई, तर इपिं वय्गु खँ
 मल्हा ।

गुलि पासापिसं ज्युनि जिपिं नं वया बाखँ कना इमिगु
 मिथ्या दृष्टि हटे याना बी मालका ल्हाः धका धया अपुक मात्र
 खँ ल्हाइ, तर धात्थें मन मञ्जु ।

तर मागुण गुरुमाँ छम्हेसिनं नेपाःयागु खँ कनेबले ध्यान
 तया नं न्यो धात्थें मन नं बिया नेपाः वय् धका वचन बिया
 बिज्याई ।

वलपोल सलंसः वर्मी अनगारिकापिं मध्य तसकं दया
 माया दुम्ह व सहयाय् फुम्ह खः । उकिं जि अपो याना
 वस्पोलयात हे नेपाःले सत्य धर्म मथुया पञ्चबलि समेत नं धर्म
 भापा हिंसा याना च्वंगु व मिसातेत ला आपालं अज्ञानं याना
 म्त्रामदुगुलि हे भूले याना तःगु खँ फुक्क कनेगु । अले वस्पोलया
 दुने थ्यंक हे नेपाःमिपिनि उपरे दया वनिगु जुया च्वन ।
 उकिं नेपाःले न्ह्याग्गु हे दुःख जूसां वय् धका वचन नं बिया
 बिज्यात । धात्थें नेपाः बिज्याना नेपाःले अनेक नय्गु त्वनेगु
 थाय् व्यवस्था मजूनवले गुलि दुःख सिमाःगु खः व फुक्क सहः

(८)

याना भोग याना थौं नीन्यादें पूवंगु उत्सव समेतं याय् दया च्वन । नेपाःमिपिनि उपरे बस्पोलया माया दया दुगुलि हे मांमं मचाया उपरे दया तया न्ह्यागुं सहः याइ थें वस्पोलं सहः याना विज्यःना च्वन ।

बर्मा ब नेपाः तुलना योत धाःसा नेपाः दे साप मिसाते निर्मित्त दयनीय अवस्थागु खः ।

वर्माय् माँ-बौपिसं काय्-म्ह्याय्या छुं भेद-भाव मतः । काय् बुसां उलि हे लय्ता म्ह्याय् बुसां उलि हे लय्ता । की जुलं काय् बुल धाय्बले मेगु हे ख्वाः, म्ह्याय् बुल धाइबले मेगु ख्वाः, मेगु हे सः । काय् बुसा काय् धका तःसकं धाई, म्ह्याय् बुलकि म्ह्याय् का धका चिसः याइगु । बुसेंनिसें हे पाका तःगु दु ।

अनं शिल्प विद्या स्यना बीगुलि नं म्ह्याय्का कपिन्त बी मानिम्ह ला खःनि धका भचा ब्वंकि । काय्यात जूसा कमाय् याना नकी तिनिम्ह धका अपो ब्वंकिगुलि माँ-बौपिगु हे नं अज्ञान खने दु ।

हानं काय्यात छेँ बुँ अंस फुककं बी, म्ह्याय्यात छेँया अंस म्वाः । क्वसः मात्रं सिधल ।

वर्माय् अथे मखु माँया प्वाथं गोम्ह जन्म जुल अंस फुककसित थ्या । काय्-म्ह्याय्या छुं भेद-भाव मदु । याक काय्पिथाय् खःसा म्ह्याय् बिया छ्वय्नं ज्यू, मखुसा अपोलं अपो काय् हे भौ दुथाय् बिया छोइगु चलन खः बर्माया ।

उकि याना वर्याय् मिसात साप भाग्यमानि छायाकि
 मां नाप म्हाय् च्वना दुःख सुख हने दु । उकि याना
 कीथाय् थें भौ व माजु ल्वाय्मा धयागु समस्या नं मदु ।
 मिजंते नं कला व मांया विच्चे कलाया खं न्यने ला मांया खं
 न्यने धयागु समस्या नं मदु । कलाया पसितःले वंम्ह धाय्क्यमा
 धयागु नं मदु । भौ नं काय् पुइका काल धका खोया जूपि
 बुरित नं सुं मदु ।

उकि जि मागुण गुरुमांयात न्हावलें वर्याय् च्वनेवले
 धया च्वनेगु नेपाः वना थथे दुःखसिया च्वंपिन्त बुद्ध धर्मया
 ज्ञान विद्या शान्ति काय्गु स्यने माला च्वंगु दु, नेपाः वने नु ।

उकि जि धम्माचरिया पास ज्वी धुंका नं हानं दच्छि
 च्वना अन च्वंपिन्त आखः व्वंका नं मागुण गुरुमांया धम्मा-
 चरिया सिमधःतल्य पिया नेपाः व्वना हयागु खः । जि आशा
 याना मागुण गुरुमांयात सलंसः अनगारिका पासापिनि विच्चे
 लोःम्ह ल्यया हयाथें वस्पोलं जित यक्व गुहालि याना विज्याना
 च्वंगु दु । उकि जि मनंतुना थें छुं बुद्ध धर्म प्रचारया ज्या
 याये दया सन्तोष दु ।

जि न्हागु ज्या न्याय्क्यत नं आंट वोगु नं वस्पोलं
 ल्यूने च्वना माक्व गुहालि याना विज्याना च्वंगुलि खः ।
 वस्पोलयात आयु आरोग्य ज्वीमा धका व नेपाःले न्हावलें
 च्वने फय्मा धका कामना याना ।

नेपालय् २५ दँ : जिगु लुमन्ति

— मा. गुणवती

जि बर्मा नेपाः बयागु थ्व दँय् २४ दँ फुना २५ दँ वयन । नेपाः वय् न्ह्यो जि नेपाःया बारे न्यनातयागु दु—तर घात्थे थथे हे धका वांलाक मस्यु । जि नेपाः बयागु हे नेपाःलय् बुद्ध शासन प्रचार-प्रसार याय्गुली ग्वाहाली बी, तिबः बी धयागु मती तथा खः । थौं नेपाः बया थःम्हं मती तथा बयार्थे बुद्ध शासनया लागी ग्वाहाली बी दया, थन बुद्ध शासन बुलुहुँ प्रचार जुया वःगु व बःलाना वःगु स्वय् दया मन लय्ताः ।

थ्वहे सिलसिलाय् जि नेपाः वय्गु मती गुकथं वन व थन बया छु छु ज्या याय् धुन घैगु थःम्हं लुमं कथं छिकपिन्त कने मास्ति वो—

अवले जि बर्माया मोलमिन शहरया खेमाराम विहारे आखः व्वना च्वनागु खः, नेपाःलं वःम्ह धम्मवती नं अन हे आखः व्वना च्वंगु । बुद्ध शासनया प्रति दृढ मती दुम्ह व बुद्ध धर्म अध्ययनया लागी तस्सकं दुःख कष्ट सिया बर्मा थ्यंकः वःम्ह जूगुलि धम्मवतीया प्रति जिमी सकस्यां विशेष स्नेह व माया दु । व नाप खँ ल्हाना बयाबारे व बुद्ध वगु

वया देया वारे सीकेगु जिमी न्ह्यावलें न्ह्याः । थथे हे खँ
 ल्हायबले धम्मवतीं न्ह्यावलें धाइ—जिमीथाय् शुद्धगु धर्म
 मस्यूनर्पि—मथूनर्पि हे उपो दनि । धर्म धँगु मथुया पञ्चवली
 पूजा समेतं धर्म धका याना च्वन तिनि । अज्ज, मिसातेत ला
 क्कन तस्सकं कोथुना तःगु दु—उमि शिल्प—विद्या, धर्मया खँ
 छुं सय्के—सीके मदु ।

थुपिं खँ न्यनेवले जिमित तस्सकं आश्रय्य जक मखु
 नुगः नं मर्छि । जिमी मतीला बुद्ध वूगु देशय् वस्पोलया शिक्षा
 जिमीथाय् (वर्माय्) सिकं अवश्य हे कः कः धाः धँगु खः ।

खँ ल्हाल्हां धम्मवतीं जित वरोवर धाइ—धम्माचरीया
 सिधय्का जि नेपाः वनेवले छर्पिं नं जि नापं विज्याहुँ । जितः
 लोःम्ह पासा छम्ह दःसा जक नेपालय् वना जि धर्म प्रचार
 याय् फे । छर्पिं छम्ह पासा दःसा जितः तस्सकं अःपुइ, उके
 छर्पिं विज्याहुँ ।

धम्मवतीया थजाःगु खँ न्यना जि अवलेनिसें हे मन
 मनं निर्णय याना तथा— जि नेपाः वना धर्मया प्रति थपायसं
 दृढ व उत्साहीम्ह धम्मवतीयात स्वाहाली बी, भरोसा बी,
 थथे याय् क्यमा धका जि प्रार्थना नं याना च्वना ।

थुकथं हे धम्मवतीया नं धम्माचरीया क्वचाल, जि नं
 क्वचाल । जिनं धम्मवती नापं नेपाः वनेगु निश्चीत जुल ।

(१२)

बर्मा नेपाः पाखे

वि. सं. २०१६ साले (१९६३) धम्मवती नापं नेपाः वय्या लागी बर्मा तोतेगु दि वल । थःगु देश तोता गुबले प्याहाँ बने मलंनिगु, अले थःम्हं न्यनाया आधारे जक स्यूगु तर धात्थें मस्यूनिगु देशय् बनेया लागी प्रस्थान याय् त्पना ! तर मती वृढ विश्वास व भरोसा दु, तःघंगु आशा व उल्लास दु — छाय्कि भगवान् बुद्धया शासनयात तिबः बीया लागी, बुद्ध शिक्षाया अमृत रस बुद्ध बूगु हे देशय् च्वंपिन्त नं सवाः थ्वीका बीया लागी, अले थःगु देशय् बुद्ध शासन उन्नति याय्गु उत्कृष्ट अभिलाषा दुम्ह नेपाःया 'योम्ह म्हाय्' धम्मवतीयात शासनिक ज्याय् ग्वाहाली व तिबः बीया लागी जि नेपाः वनाच्वना ।

अवले बर्मा नेपाःले तप्यंक हवाई सम्पर्क मदुनि । उकि बर्मा कलकत्ता तकक वया । ३ घण्टा हवाई यात्रा याना कलकत्ता थ्यन । कलकत्ताया विमानस्थलय् रत्नमंजरी गुरुमां, मणिहर्ष साहु व चन्द्रकुमार गुरुजुपि वया काः वयाच्वन । चच्छि बर्मी विहारे च्वना कनेखुन्हु मणि साहुया छें सरे जुया । केशरीलक्ष्मी साहुनी व दानलक्ष्मी साहुनीपिन्सं माक्को विचाः याना दिल । अन प्यन्हु न्यान्हु च्वना कलकत्तां हवाई जहाजं नेपाः पाखे वया । अवले कलकत्तां नेपाः वय्त हे ३ घण्टा बी । जिमी नापं रत्न मंजरी गुरुमां नं नापं वल ।



मा. गुणवती व धम्मवती

बि. सं. २०१९ साले नेपा: बिज्या:बले



येय ध्यन

प्लेन दित । जिपिं ववाहाँ वया—नेपाः ध्यन !!
 धात्थे खःला ! बुद्धया देश नेपाः । थः अपाय्स्सं योगु शान्ति
 व सुखया ले वयना विज्याम्ह बुद्धया देश ! अले नेपाःलं
 वमयि ध्यना च्वंगु वमयि तःजिगु व कः कः धाया च्वंगु धर्म
 नेपाःयापिन्त इना वीगु थःगु इच्छा व आकांक्षा आः पूवनीगु
 जुल ।

विमानस्थलय् धम्मवतीया माँ, दाजुकिजापिं, सुदर्शन
 भन्ते, महाप्रजा गुरुपिं सहित आपालं उपासक उपासिकापिं
 वया काः वया च्वन । बर्मा थ्यंक वनाः, अज्ज विस्यू बना,
 यक्को सय्का सिइका वम्ह धम्मवतीयात अनयाःगु स्वागतं जि
 थू—नेपाःमिपिन्सं थुम्ह नेपाःमि म्हाय्मचापाखें बुद्ध शासनया
 लागी यक्को आशा याना च्वंगु दु । उमिगु मुसुमुसु म्ह्यगु
 ख्वालं सीदु—उमिके छगू न्हगू आशा व विश्वास दना वःगु
 दु । गय् व गुकथं ज्वी धका जि कल्पना मयानासां जिगु
 मनंमनं धया च्वन—धम्मवती थुमिगु आशा व विश्वास
 फय्फुगु थां खः । थुमिगु आशा व विश्वासयात फया धम्मवतीं
 बुद्ध शासनयात कः कः धाय्कीतिनी, वःलाकीतिनी, विस्तृत
 याइतिनी । धम्मवतीया नेपाः ल्याहाँ वःगु दि नेपाःया बुद्ध
 शासनय् छगू महत्त्वपूर्णगु जक मखु छगू आवश्यकता नं जुया
 च्वंगु खँ जि लिपा थ्वीका ।

अवले जिपीं च्वनेत विहार मद्दुनि, उकिं विमानस्थलं

(१४)

धम्मवतीया छेँय् वना । अन च्वंतले माक्को फुक्क धम्मवतीया
मां प्रमुखं परिवारपिन्सं पुरेयाना तल । थुगु ईलय् नेपाः व
नेपाःमिपिनिगु बारे यक्को खँ सीका, अनुभव याना ।

अवले गणमहाविहार नकतिनी नकतिनी लुयावःगु
जुया च्वन । अन सुमंगल भन्ते नं ५०-६० म्हति मस्तेत
आखः ब्वंका च्वना बिज्यागु जुया च्वन । भन्ते विदेश्य्
बिज्याय माःगु जुया उपि मस्तेत आखः ब्वंकेगु ज्या जिमित
लः ल्हाना बिज्यात । उकें जिपीं नं येँ ज्याःवहाले भाजु रत्न
शाक्य व ज्ञानमान शाक्यया छेँय् च्वना अन हे उपि ५०-६०
म्ह मस्तेत धम्मपद, त्रिरत्न वन्दना, परित्राण इत्यादि धमाधम
ब्वंकेगु याना । थुकथं अन प्यला-न्यालाति च्वना ।

अवले स्वयम्भू ज्ञानमाला खलः पाखें वाहा-बहिल्य्
बुद्ध-पूजा न्याय्का च्वंगु जुया च्वन । अले भन्तेपिनीपाखें
बाखें कनेगु ज्या नं जुयाच्वन । एबहे कार्यक्रम्य् पूज्य सुदर्शन
भन्ते नं जिमित नं बाखें कनेगु पाः विया बिज्यात । अवले जि
नेवाः भाय् बांलाक ल्हाय् हे मसनि । उकें जि बर्मी भासं
कनाः धम्मवतीं नेवाः भासं अनुवाद याना बीगु यात । थुकथं
विहारय्, त्वाः-त्वाःलय् नं बाखें कनेगु शुरु जुल । थुकथं
छथाय् निषाय् यायां यक्कोथाय् बाखें कना वना । बाखें
व्यंपिन्सं सवाः थुया वः लिसे न्यनीपि नं कं क वढेजुया वल ।
विस्तार विस्तारं जिमित माःगु विचासचा याइपि नं दया वल ।
अले दातापिन्सं गुरुमांपिन्त च्वनेगु भाय् छगू बन्दोबस्त याय्माल
धका विचाः याना विहार दय्केगु थाय् स्वः जुल ।

धाधामघां २०२० साल गुंला थ्यन, तःखाछेँ दान-
लक्ष्मी साहुनीया छेँय् च्वना अन हे गुंला लच्छियंक बुद्ध-पूजा
याय्गु व बाखेँ कनेगु नं याना !

बिहार गन दय्केगु ?

दातापिन्सं विहार दय्केत विभिन्न थाय् स्वः जुल ।
फुककस्यां थःपिन्थाय्पाखे हे जिमित तय् मास्ते वो । उकेँ
विहारनं थःपिन्थाय्पाखे हे दय्के मास्ते वो । धम्मवतीया माँ
व दाजुकिजापिन्सं यलय् हे विहार दय्का जिमित अन हे तय्त
मेहनत याना च्वन । येँ च्वंपि चतुरत्न, भाजुरत्न, ज्ञानमान
शाक्यपिन्सं क्वःनेपाखेँ हे विहार दय्का बीगु मती तथा च्वन,
ज्याबहाल, क्वंसाबहाले (आः अ. पटाचारी व धम्मदस्सी
वज्येपि च्वनाच्वंगु) विहार दय्का बीगु निर्णय याना तल ।

अर्थे हे येँया थःनेपाखे च्वंपिन्सं नं नयाँ सडक, दुगंबही,
श्रीघः, भगवानबाहाःपाखे हे विहार दय्का बीगु मती तथा
थाय् स्वः जुल ।

फुककस्यां गुरुमाँपि दत्तकी बाखेँ न्यंबय अःपुइ, धर्म
सय्के सीके अःपुइ धैगु अभिलाषा जुया च्वन ।

यक्को दृष्टिकोणं श्रीघःलय् विहार दय्केगु पाय्क परे
जूगु खने दत । श्रीघःलय् हे विहार दय्केगुली विशेषं
लक्ष्मीप्रभा असं, केशरी लक्ष्मी जमल व दानलक्ष्मी तःखाछेँ
साहुनीपिन्सं विशेषं जोड बिया फुगु ग्वाहाली नं याय् धैगु

(१६)

भलसा विया दीगु खः । फुक्कसिगु सहमतं श्रीघःलय् हे
रत्नवहादुर मालीया जग्गा न्याना विहार दय्केगु निर्णय जुल ।
धम्मवतीया वाः नं थः सी न्ह्योः म्हाय्यात धका स्वदो दाँ
विया थकुगु जुया चवन । जग्गाया मूनं स्वदो ! उकें धम्मवती-
या बानं विया थकुगु घेबां जग्गा न्याना अड्डा खर्च न्यासः दाँ
चतुरत्न शाक्य ज्याबहाः नं तया दिल । थुकथं थौया धर्मकीर्ति
विहारया स्थापनाया पूर्व-तयारी ज्या पूवन । उवले शायद हे
सुनानं कल्पनायागु दै—अबलेया उगु थासय् धर्मकीर्ति विहार-
या थौया रूप काइ धका !!

उगु थासय् थौया धर्मकीर्ति विहारया रूप छकोलं वने
जूगु मखु । छकूछकू यायां विस्तार विस्तारं विस्तृत व परिवर्तन
जुजुं थौया धर्मकीर्ति विहारया स्वरूप तयार जूगु खः । अवले
शायद हे सुनानं कल्पना याःगु खइ—अबलेया कारणात्तं जाया
च्वंगु उगु थासं धर्मकीर्ति विहारया थौया रूप काइ धका !
त्तर थ्व फुक्कं सम्भव जुल—फुक्क उपासक उपासिकापिनिगु,
श्रद्धालुपिनिगु, दातापिनिगु अटुट तिव्रः व ग्वाहालिं !!

धर्मकीर्ति विहारया स्थापना

जग्गा न्याय धुंका विहार दय्केगु ज्या शुरु जुल ।
विहार निर्माणया ज्याय् विशेषं लक्ष्मीप्रभा साहुनी, केशरी
लक्ष्मी साहुनी व दानलक्ष्मी साहुनीपिन्सं स-श्रद्धा ग्वाहाली
विया दीगु खः । नापं फुक्कसिगु श्रद्धा कथं ४२ फुट हाकः व

२१ फुट व्या दुगु छत जाःगु विहार तयार जुल । विहारया नां 'धर्मकीर्ति विहार' धका तथा । ध्व समय खः—२०२२ सालया बैशाख (बैशाख पुन्ही च्यान्हु न्ह्योःया अष्टमी खुन्हु) । ध्वहे दियात थौं तक्कं धर्मकीर्ति विहारया जन्मदिया रूपे भोजन दान व विभिन्न कार्यक्रम याना न्याय्का वयाच्चंगु दु । थुकथं धर्मकीर्ति विहारया स्थापना जुल ! धर्मकीर्तिया इतिहासया शुरुवात जुल !! थुकिं नेपाःल्य् बुद्ध शासन प्रचार-प्रसार व संवर्द्धन याय्गु जिमिगु अभिलाषायात न्हूगु मोड व गति नं प्राप्त जुल ।

अवले चिकिचाधंगु धर्मकीर्ति विहारं थौंया रूप गुकथं काः वल धका नं कने मास्ते वोः । समय अनुसारं आवश्यकता खने दया वःलिसे छकू छकू यायां दातापिनी श्रद्धाकथं विस्तार व निर्माणया ज्या जुया वःगु खः । उर्पिं ज्यात थुकथं खः—

बि. सं. २०२४ साले हेराकाजी डिल्लीबजारं पूर्वपाखे मुत्तू छकू देका दिल । २०२५ साले नन्दलाल जोशीं हिती व मोः ल्हुइगु कोठा देका दिल ।

२०२५ साले हे धम्मबतीया मां व किजा मोतिकाजी-यापाखें छत जाःगु धर्मकीर्ति विहारयात नित जाः याना दिल । तले दथु कोठा छकू थकाया दिल ।

२०२८ साले हेराकाजी व कुलिसरत्न साहु प्रमुख बुद्ध-पूजाय् फाइपिन्गु ग्वाहालीं बुद्ध-पूजा याय्गु हल तःधंकेगु व तले पूर्व उत्तरपाखे मेगु छगू कोठा थकाय्गु ज्या जुल ।

(१८)

२०३० साले हेरादेवी जनबाहाः नं माया नामं तले पूर्व
दक्षिणपाखे छकू कोठा थकया दिल ।


२०३२ साले हर्षरत्न व सानुरत्न साहुपिन्सं थः माँ-अबु
व कान्छा साहुया नामं पश्चिमपाखे नित थकया निगूगु तल्लाय्
बुद्ध मूर्ति सहितगु हल व स्वंगूगु तल्लाय् स्वंगू कोठा देका
दिल ।

२०३७ साले बुद्ध-पूजा याय्गु हल चीघं जूगुलि
दक्षिणपाखे दुगु बगैंचा तोपुया हल देकेगु ज्या जुल, हेराकाजी
साहु व आशामाया मरूपिनिपाखें ।


२०३८ साले बुद्ध-पूजा हले छम्ह जक बर्मी बुद्ध मूर्ति
दुगुली चन्द्रमाया मर्चलि मेम्ह छम्ह बुद्ध मूर्ति व बुद्ध-पूजा
खलःया श्रद्धां लुँ सियातःम्ह सिजःयाम्ह दनाच्चंम्ह बुद्ध मूर्ति
स्थापना याय्गु ज्या जुल ।

२०४० व २०४३ साले निकः याना भिमबहादुर,
दिलमाया मासंगल्लीपिनीपाखें दक्षिणपाखेया कःसी तोपुया
कोठा देकेगु ज्या जुल । २०४० साले अष्टमाया, मोहनपिनी-
पाखें पम्पु हिटी तया दिल व २०४३ साले कृष्णदेवी क्षेत्रपाटी-
पाखें बहे पम्पु हिटी हानं न्हू याना तया दिल ।


विहारे काइपि उपासक उपासिकापि बढे जुया वःथें
विहारे च्वनीपि अनगारिका गुरुमाँपि नं बढे जुया वयाच्चंगु
दु । नापं इलेबिले नेपालं व बिदेशं वइपि पाहुनापि नं वया
च्चंगु दु ।



वि. स. २०२२ सालय्



वि. सं. २०२५ सालय्



वि. सं. २०३२ सालय्

धर्मकोर्ति विहारया विभिन्न रूप : विभिन्न समय

Downloaded from <http://dhamma.digital>



Dhamma.Digital

अवले छतजाःगु उगु विहारया वच्छी भागे बुद्ध-पूजा आदि अन्य गतिविधिया लागि बुद्ध मूर्ति सहितगु छगू हल व वच्छी भागे च्वनेगु कोठात दुगु खः । विहार दसेलि ज्या याय्त अःपुल, छिन । आः छु ज्या याना वनेगुले ? वैगु विषय सल्लाह व विचाः याना ।

श्रद्धालु उपासक उपासिकापिनिगु मति व आग्रह कथं न्हापां बुद्ध-पूजा व धर्मदेशनाया कार्यक्रम दय्का लय न्याकः (पुन्ही, आमाई, संलहु व अष्टमी निकः) । थुगु ज्या थौं तक्कं अटुट रूपं न्ह्याना हे वयाच्चंगु दु । बुद्ध-पूजाय् फाइपि नं क्रमिक रूपं वृद्धि जुजुं वःगुलि विहारया हल तस्सकं चिकू जुया वल । विहारयात तःध याय्मागु आवश्यकता खने दया वल । बुद्ध-पूजाया नापं भतिभति यायां भावना अभ्यास याकेगु ज्या नं शुरु याना ।

मस्तेत शिक्षा बीगु नं आवश्यक खने दुगुलि थ्वहे सालनिसें न्हिन्हि सुथे सुथे मस्तय्त आखः ब्वंकेगु ज्या नं शुरु याना । मस्तय्त उमिगु स्तर अनुसारं ग्वः आखः स्यनेगु नाप नाप बुद्ध-पूजा, दशपारमिता, अर्थ सहित मंगलसूत्र, परित्राण, धम्मपद, व अभिधर्म आदि नं स्यनेगु याना । न्हिन्हि ब्वंवइपि मस्त नं आपालं दया वल । निम्ह प्यम्ह मस्त तथा शुरु यानागु उगु कक्षाय् सलंसः मस्त ब्वंवइपि दत । फुक्कं याना आः तक्कया दुने थुकथं विहारे आखः ब्वना वंपि मस्त न्यादो-खुदोलं मयाय् धुंकल । उंपि मस्त थौं तःधी जुया विभिन्न

(२०)

क्षेत्रय्, थःथःगु ज्या (पेशा) याना च्वंगु दु । विहारे मवःसां उमिके आः तक्कं धर्मया प्रभाव लाना हे च्वंगु दु । पसः वनेबले पसः पसलय्, अस्पताले, सरकारी अफिसय्, स्कूल-कलेजय् थुपि मस्त बरोबर नाप लाः ।

व्यवस्थित रूपं परिक्षा दय्का ब्वंके दःसा क्कन अप्पो बांलाइ घैंगु मति तथा धर्मकीर्ति विहारे हे विभिन्न स्तर व परिक्षात नं दय्का । धर्म अध्ययन याइपिन्त प्रोत्साहन बीया लागी सफल जूपिन्त पदवी व पुरस्कारत नं बीगु याना ।

धम्मपद व अभिधर्मया न्यागू कक्षा तक्कया परिक्षा दय्का । प्रत्येक कक्षाय् धम्मपदया न्यागू वर्ग व अभिधर्मया निगू कण्ड यायां धम्मपदया नीखुगू वर्ग व अभिधर्मया गुंगू कण्ड सिधय्कूपिन्त 'धम्मधर' घैंगु पदवी नापं पदक व पुरस्कारया व्यवस्था नं याना ।

अवले त्रिशुलीया धर्मरत्न शाक्यया आग्रहकथं पूज्य बुद्धघोष भन्तेया सक्रियताय् भिक्षु महासघपाखें नेपाल बौद्ध परियत्ति शिक्षा नं नकतिनि नकतिनि शुरु जूगु खः । परियत्ति शिक्षा बुद्ध शासनया जग जुयाच्वंगु कारणं थुकीयात अभिवृद्धि याय्मा घैंगु मती तथा धर्मकीर्ति विहारे नं मस्तेत परियत्ति ब्वंकेगु, परिक्षा वीकेगुया नापं परिक्षाय् बोर्ड वःपिन्त विहारय् हे पुरस्कार बीगु नं याना च्वना । अवले तक्क परियत्ति शिक्षायापाखें पुरस्कार बीगु व्यवस्था मडुनि ।

नेवाः समाजय् मिसातयत्त कर्म खंकेगुया रूपे किनिन्हु (१२ दि) तक्क कोठाय् कुना बाह्ला तय्गु छ्गू परम्परा दु । थोंकन्हे थ्व ज्या माँ-बौपिन्त नं थाकुया वयाच्वन । मस्तेत नं किनिन्हु तक्क शुद्धगु फय् मदय्क ख्युंक, नवय्क कुंका च्वने माःगुलि तस्सकं थाकु । उकें थ्व परम्परायात बौद्ध पहलं हीके दःसा ज्यू धँगु मत्तितया किनिन्हु तक्क बाह्ला तय्गु सत्ता विहारे हया किनिन्हु तक्क ऋषिनी प्रव्रज्या बीगु ज्या नं शुरु याना । थुगु समय जोःछि उपि ऋषिनीपिन्सं अष्टशिल पालना याना च्वनी । उमित बुद्ध शिक्षा सम्बन्धि ब्वंकेगु-स्यनेगु नापं ध्यान भावना याकेगु नं याना च्वना । आः तक्क धर्मकीर्ति विहारे ५०० म्हं मयाक्क मिसा मस्तसें थुकथं ऋषिनी प्रव्रज्या काय् धुं कुगु दु ।

च्यान्हुइ छकः बुद्ध-पूजाय् काइपि श्रद्धालु उपासक उपासिकापिनं वढे जुया बल । बुद्ध-पूजाय् काइपि उपासिकापिनि विहारे वनेबले छु वसः पुना वने ? बांवांलागु वसः हे पुना वनेमा धँगु भावना मदय्का साधारण वसः पुनेगु, सकस्यां जोडां पुनेगु व थःगु देशय् तयार जूगु घरेलुया पसि सिनेगु नं बानि याकेया लागी विहारे वय्बले ज्वरा पसि सिनेगु प्रचलन न थ्वहे विहारं न्हापां शुरु जुल । थुकेंयाना वांलागु वसःया होड व मद्दुपिनी गन कया पुनेगु धँगु धन्दा मन्त । नापं फुक्कस्यां जोरा पसि सिनेवले सम-भावना नं अपुक्क हे पिज्वल । स्वदेशी उद्योगयात नं तिबः जूबन । थ्व प्रचलन थों मेमेगु विहारय् नं दया वःगु लय्ताये बःह जू ।

(२२)

अध्ययन गोष्ठीया स्थापना

धर्मकीर्ति विहारया स्थापनाया खुदें (६ वर्ष) लिपा २०२८ साले धर्मकीर्तिया गतिविधिइ छगू न्हूगु पःला थपे जुल—व खः धर्मकीर्ति बौद्ध अध्ययन गोष्ठीया स्थापना । आः तक्कया दुने याना वयागु शाशनिक ज्याया माध्यमं विहारय् वइपिनिगु संख्या गाक्कं बढे ज्वी धुं कल—बुद्ध-पूजाय् काइपिं नापं सुथे सुथे आखः ब्वंवइपिं मस्तनं । थुलिया दुने धार्मिक गतिविधित नं यक्को हे बढे जुल । विहारय् काइपिन्त बाखँ कनेगु, स्यने कने याय्गुया नापनापं पिनेपिने नं थाय्थासय् धर्मदेशना, बुद्ध-पूजा, परित्राण नं यक्को जुया वल । धर्मय् श्रद्धा दुपिं व तय्सपिं नापनापं व्यवहारय् छ्यले सःपिं नं दयावल । पूजापाठ व धर्मदेशनाया नापं भावना याइपिं नं बुलुहुँ बुलुहुँ दया वयान्वन । थःम्हं धर्म थूथें थः परिवार, थःथिति व पासापिन्त नं धर्मे ध्वाय्सःपिं जुयावल । नापं थः काय् म्हाय् छेँयापिन्त नं विहारय् ध्वाना हइपिं, नापं मस्तसें नं थः पासापिन्त विहारय् साला हल । थुकथं धर्मे मन दुपिं मस्तेगु संख्या गाक्कं बढे जूगु जक मखु—उपिं बाखँ जक न्यनां सन्तोष मज्जीपिं नं जुया वल । धर्मया विभिन्न पक्षया बिषय अप्पो क्रमबद्धरूपं गहन अध्ययन याय्गुनी अभिलाषा याइपिं जुया वल ।

ध्वहे आवश्यकतायात पूर्वकेया लागी बि. सं. २०२८ साल जेष्ठ ७ गते स्विम्ह (३०) युवा सदस्यपिं मुंका

धर्मकीर्ति बौद्ध अध्ययन गोष्ठीया विधिवत स्थापना जुल ।
 अध्ययन गोष्ठीया स्थापनाया मूल उद्देश्य हे थःम्हं नं धर्मया
 अध्ययन याय्गुया नापं मेमेपिन्त नं ध्वीका बीगु हे खः ।
 धात्थेनं अध्ययन गोष्ठीया स्थापनानिसें धर्मकीर्तिया गतिविधिइ
 टेवा व गति व्यूगु जक मखुसैं यक्को न्हून्हूगु आयामत नं थपे
 जूगु दु । थ्व धाय् दया लय्ताः वः कि अध्ययन गोष्ठीया
 माध्यमं यक्को ल्याय्म्ह ल्यासेपिन्त धार्मिक क्षेत्रय् साला
 काय्गु व धार्मिक भावना दय्का व्यूगु दु । धर्मया माध्यमं
 सामाजिक व नैतिक दायित्वया बोध याना व्यूगु दु । अध्ययन
 गोष्ठीया प्रत्येक कार्यक्रमय् विहारया उपासक उपासिकापिन्सं
 भाक्को ग्वाहाली बिया वःगु दु । अध्ययन गोष्ठीया स्थापनाया
 उद्देश्यत छु छु धका नं छिकपिन्त कने मास्ते वोः—

- (१) बुद्धया शिक्षायात न्हापां थःम्हं बांलाक अध्ययन याय्गु ।
- (२) थःपिन्सं सय्कागु शिक्षायात गाँ-गामे वना मेपिन्त नं कनेगु ।
- (३) देश विदेशं वःपि बौद्ध विद्वानपिन्त स्वागत सत्कार याना विचाः व ज्ञानया आदान प्रदान याय्गु ।
- (४) बुद्ध व बुद्ध धर्म सम्बन्धि सफू-पत्रिका प्रकाशन याना तातापाक्क नं धर्म प्रचार याय्गु ।

(२४)

थुपिं प्यंगुलि उद्देश्यत हनेया निमित्त विभिन्न ज्या खँत थौं तक्कं अटुट रूपं न्ह्याना च्वंगु दु । अज्ज थुके यक्को विस्तृत नं ज्वी धुं कुगु दु । अध्ययन गोष्ठीया स्थापना जुसँनिसें हे थुकियात पूज्य अश्रघोष भन्तेयापाखें क्वातुसे च्वंगु सहयोग व निर्देशन अटुट रूपं प्राप्त जुया च्वंगु दु ।

न्ह्यापांगु उद्देश्य कथं—प्रत्येक शुक्रबार न्हिने बुद्ध धर्म सम्बन्धि कक्षा शुरु जुल । उगु कक्षाय् बुद्ध जीवनी, गृही विनय इत्यादि अध्ययन नापं बुद्ध धर्मया विभिन्न पक्षत कथा प्रवचन नं जू । विद्यार्थीपिन्त तालिमया रूपे लेख च्वय्गु, न्बवाय्गु, सभा सञ्चालन याय्गु, रिपोर्ट च्वय्गु इत्यादि विषय तालिम नं शुरु जुल । नापं इलयविलय बौद्ध हाजिरी जवाफ, वाद-विवाद, खँल्हावल्हा (Dialogue) छलफल इत्यादि कार्यक्रम नं शुरु जुल ।

थुकथं अध्ययन गोष्ठीया कक्षाय् वइपिं विद्यार्थीपिनिगु संख्या सँच्छ मयाक नं दया वल ! थौं कन्हे थव कक्षा विद्यार्थीपिनिगु सुविधानुसारं प्रत्येक शनिबार सुथय् संचालन जुया च्वंगु दु । कक्षा अप्पोयाना पूज्य भन्ते अश्रघोष, धम्मवतीपाखें व गुबलें अतिथी वक्तापिनीपाखें व आःला अध्ययन गोष्ठीया सदस्यपि थःथःपिन्सं हे नं कक्षा संचालन याना च्वंगु दु ।

निगुगु उद्देश्य कथं—न्ह्यापांगु दँय् हे त्रिशूली धर्म प्रचार यात्रा जुल । अनं लिपा यें, यल, ख्वपया विभिन्न गाँ-गामय् वना धर्म प्रचार याय्गु ज्या आः तक्कं जुया च्वंगु



अध्ययन गोष्ठीया सदस्यपि नाप : बि. सं. २०२८ सालय्

दु । थुकेंयाना न्ह्याबलें धर्मया खँ न्यनेगु अवसर मदुगु उगु थासय् च्वंपिन्त धर्मया खँ न्यने दइगु जुलसा यें च्वंपि कीत नं विभिन्न गां व अन च्वंपि मनूतेगु जीवनया बारे सीकेगु सय्केगु अवसर प्राप्त जूगु दु । आः तक्क ५० गुलि मयाक गामय् वने धुंथें च्वं । नापं इलय् बिलय् उपत्यकां पिने नेपाःया पूर्वनिसें पश्चिम तक्क वना धर्म प्रचार याः वनेगु ज्या नं जुया च्वंगु दु ।

स्वंगूगु उद्देश्य कथं—देश विदेशं वःपि बौद्ध विद्वान-पिन्त विहारे स्वागत सत्कारया कार्यक्रम जुया वया च्वंगु दु । आः तक्क २०-२५ गू देशया बौद्ध विद्वानपिन्त स्वागत ज्वी धुंकुगु दु । थुकेंयाना बौद्धया नातां नेपाः वइपि विद्वानतेत नेपाःले नं बौद्धतेगु व बौद्ध गतिविधिया परिचय विया च्वंगु दुथें उपि देशया बौद्ध गतिविधिया बारे थःपिन्सं सीकेगु अवसर नं प्राप्त जुया च्वंगु दु ।

प्यंगूगु उद्देश्य कथं—आः तक्कया दुने १०० गुलि मयाकक चीधंगु-तःधंगु सफू प्रकाशन ज्वी धुंकुगु दु ! न्ह्याबलें विहारे वये मफुपिनिगु लागी धर्मयाबारे सीकेत थुकें यक्को ग्वाहाली ब्यूगु दु । नापं नेवाः व नेपाली भाषाय् बुद्ध धमे सम्बन्धी सफूयागु अभाव छुं भति जूसां पूति जूगु दु । नापं थूपि सफूत उपत्यकां पिने ता-तापाकक गां-गामय् नं छ्वया च्वना । अन च्वनिपिगु लागी थुपि सफूत यक्को लाभप्रद जुया च्वंगु दु ।

बि. सं. २०२६ सालनिसें हे 'धर्मकीर्ति' नांगु पत्रिका

(२६)

द्वै छगू पिकया वया च्वंगु दु । २०४० सालनिसें थ्व पत्रिका निलाय् छगू व २०४२ सालनिसें मासिकया रूपे प्याहाँ वया च्वंगु दु । पत्रिकाया प्रकाशन प्रधान सम्पादक जुया बिज्याम्ह पूज्य अश्वघोष भन्ते, माक्को ग्वाहाली बिया दीम्ह सानु साहु नापं अध्ययन गोष्ठीया मस्त व मेमेपिं यक्कोसिगु श्रद्धा व ग्वाहालि हे न्ह्याना च्वंगु खः ।

वि. सं २०२८ सालं हे धम्मवतीया माँ व किजा मोतिकाजीयात बुद्धगयाय् यंका छुं दिनया लागी अनगारिका व श्रामणेर प्रव्रज्या याना हया । थुकथं दुर्लभ प्रव्रज्या अल्पकाल रूपय् जूसां ग्रहण याय्गु कार्यक्रम नं निरन्तर रूपं जुया हे वया च्वंगु दु ।

वि. सं. २०२९ सालनिसें धर्मकीर्ति पत्रिकाया वार्षिक प्रकाशन शुरु जुल । थ्वहे दैय् धर्मकीर्ति बौद्ध अध्ययन गोष्ठीया न्हापांगु वार्षिकोत्सवया उपलक्ष्यय् अध्ययन गोष्ठीया सदस्यपिन्त हस्तकला सम्बन्धी तालिम व बिहारय् भव्यरूपं प्रदर्शनी न्याय्कल । उक्त प्रदर्शनी बुद्ध मूर्ति व चित्रकला नापं अध्ययन गोष्ठीया सदस्यपिन्सं हे तयार याःगु भों-स्वाँया प्रदर्शन नं बाँलाक जुल । नापं अन्तर बिहार बौद्ध हाजिरी जबाफ प्रतियोगिता नं सम्पन्न जुल ।

व हे सालं बर्मा प्राप्त जूम्ह आसन सहितगु बुद्ध मूर्ति भव्यरूपं जात्रा याना भोंतया ध्यानकुटी बिहारय् प्रतिस्थापन याय्गु ज्या जुल । उगु जुलुसय् येँ, यल, ख्वप व भोंतया द्वलदोः श्रद्धालु उपासक उपासिकापिन्सं भाग काल ।

वि. सं. २०३० साल बैशाख पुन्हीया उपलक्ष्यय् छगू न्हूगु कार्यक्रम शुरु जुल — बैशाख पुन्हीखुनु काठमाडौंया फुक्क अस्पतालय् वना अनया विरामीतेत बिस्कुट व फलफुल इनेगु । थ्व कार्यक्रम नं आः तक्क न्ह्याना हे वयाच्चंगु दु । थ्वहे दँनिसें मेगु नं कार्यक्रम शुरु जुल — प्रत्येक पुन्हीया छन्हु न्ह्यो श्रीघः चैत्य व बाहाः सफा याय्गु कार्यक्रम । विहारय् फाईपि उपासक उपासिकापि थःपिन्सं हे तुफि-च्वाफि इत्यादि ज्वना बँ पुना बाहाः सफा याय्गु ज्या नं अटुटरूपं न्ह्याना हे वया च्वंगु दु ।

थ्वहे दँय् स्वास्थ्य सेवाया मेगु नं कार्यक्रम शुरु जुल — डा० धीरमान शाक्य व सिष्टर (नर्स) तारादेवीया सक्रिय सहयोगं विहारय् विरामीतेत जाँचे याय्गु व मदुपिन्त वासः नं वीगु । थ्व कार्यक्रम २-३ दँ तक्क चले याना । न्हापां विहारय् शुरु याना लिपा साप्ताहिक रूपं गाँ-गामय् वना नं स्वास्थ्य सेवा याः वनेगु तक्कं याना ।

थ्वहे दँय् विहारया आयोजनाय् वसं चारधाम वनेगु ज्या नं सम्पन्न जुल । नेपाल थुकथं वसं चारधाम वनेगु ज्या जि स्यूकथं थ्वहे न्हापांगु खः ।

वि. सं. २०३१ साले नं मेमेगु ज्याया नापं कालि-माटीया टि० वि० (क्षयरोग) अस्पताले लःया त्यांकी तथा, घडी छग नं प्रदान याना, नापं विरामीतय्त माःगु अन्य छुं वस्तुत नं फुकथं प्रदान याना ।

(२८)

वि. सं. २०३२ साले विहारय् काइपि उपासिकापिन्त नं आखः स्यनेगु कथं प्रौढ शिक्षा गुरु याना । आखः स्यनेगुया नापं दय्कःपिन्त नं धम्मपद, अभिधर्म, गृही विनय इत्यादि ब्वंका परिक्षा समेतं काय्गु, परिक्षाय् पास जूपिन्त प्रत्येक वर्षय् पुरस्कार वीगु नं गुरु याना । थ्व ज्या नं न्ह्याना हे वया च्वंगु दु ।

नेपाःमि बौद्धपिन्त नं बौद्ध देशया भ्रमण याका बहुश्रुत दय्का वीगुया लागी, उपासक उपासिकापिनिगु लागी वर्मा व थाइल्याण्डया भ्रमणया आयोजना याना । थ्व यात्राया मेगु विशेषता—नेपाः ल्याहाँ वया १४ दँ तकक धर्म प्रचार याय् धुंका धम्मवती हानं वर्मा वंगु थ्व न्हापांगु पटक खः ।

वि. सं. २०३३ साले—नेपा.मिपिन्त थःगु हे देशया विभिन्न भागया अनुभव याकेगु नापं, विभिन्न थाय्या बौद्ध गतिविधि जानकारी याकेगु कथं पूर्वनिसें पश्चिम तकक (७ गू अञ्चल) 'नेपाल-दर्शन' यात्राया आयोजना जुल । अनया बौद्धत व बौद्ध गतिविधिया परिचय नापं थाय् थासय् बुद्ध-पूजा, धर्मदेशना, प्रवचन नापं बुद्ध जीवनी सम्बन्धी स्लाइड तककं प्रदर्शन जुल ।

वि. सं. २०३४ साले अन्य कार्यक्रमया नापं अध्ययन गोष्ठीया सदस्यपिन्त 'विरामी बिचाः याय्गु' तालिम, 'प्राथमिक उपचार तालिम' सञ्चालन जुल । नापं अध्ययन गोष्ठीया सदस्यपिन्सं विभिन्न बौद्ध नाटकत दय्का प्रदर्शन यात ।

श्वहे दैय् अध्ययन गोष्ठीया मिसापि सदस्यतेगु छगु समूह भोंतया ध्यानकुटी विहारय् ऋषिनी प्रव्रज्या ग्रहण याना बुद्ध धर्म अध्यय व अभ्यास याय्गु ज्या नं जुल ।

वि. सं. २०३५ साले अध्ययन गोष्ठीया १४ म्ह सदस्यपि भोंतया ध्यानकुटी विहारय् अल्पकालिन रूपं श्रामणेर प्रव्रजित जुल । १४ म्ह युवकतय्गु सामूहिक प्रव्रज्या नापं उमिसं येँ व भोंतय् सामूहिक भिक्षाटन याःगु घटना नं तस्सकं उल्लेखनीय जू ।

व हे दैय् पाँचखालया समाज कल्याण केन्द्रय् (माँ-बौ मद्रुपि अनाथपि मस्त च्वनीगु केन्द्रय्) बना अन च्वंपि मस्तेत माःगु सामानत (स्टीलया भू, रुमाल, गा, वसः) बीगु, नकेगु नापं उगु केन्द्रय् मस्तय् न्हिन्हि प्रार्थना याय्या लागी छगु बुद्धया मूर्ति नं प्रदान याना । श्व ज्या स्वदँ तक्क याना ।

श्वहे दैनिसँ नेपाः व भारतया विभिन्न थाय् थासय् च्वंगु महत्वपूर्णगु विहार, चिभाः, बौद्ध स्थलय् बनाः बुद्ध-पूजा याय्गु अभियान शुरु जुल । न्हापांगु बुद्ध-पूजा नमुराय् जुल । अनं लिपा श्व अभियान अन्तर्गत नेपाःया पूर्वनिसें पश्चिम तक्कया विभिन्न थाय् (तानसेन, धरान, नारायणघाट, त्रिशूली इत्यादि) नापं कुशीनगर, सारनाथ, बुद्धगया इत्यादि थासय् तक्क बनाः बुद्ध-पूजा याय्गु ज्या जुल । श्व अभियान खुदँ तक्क न्हात ।

वि. सं. ०३६ साले जितः व धम्मवतीयात वसाय् आखः ब्वंका विज्यापि गुरुमाँपि दो. पञ्चाचारी व दो-मुखाकारीपि

नेपाः बिज्यात । वसपोलपिन्त नेपाले थाय् थासय् यक्को स्वागत जुल । न्हापां धर्मकीर्ति विहारय् बहःनि बहःनि विपस्सना भावना स्यनेगु व प्रवचन बिय्गु याना बिज्यात । ध्यान याः वइपिं यक्को दु । अनंलि वसपोलपिन्सं फिन्हु-फिन्हुया विपस्सना शिविर संचालन याना बिज्यात । भोंतय् फिन्हु-फिन्हुया निगू शिविर, बलम्बुइ छगू व लुम्बिनी छगू शिविर तथा बिज्यात । आधुनिक नेपाःया बुद्ध शासनया इतिहासय् सामूहिकरूपं विपस्सना शिविर तय्गु परम्परा थनं हे न्हापां शुरु जुल । नापं दान व शीलया यक्को प्रचार व अभ्यासं लिपा ध्यानया प्रचार व अभ्यास याय्गु ज्या नं शुरु जुल । अनंलि छसिकथं ध्यान अले विशेष विपस्सनाया प्रचार-प्रसार जुया वया च्वंगु लय्ताय् बहःगु खं खः । आः विपस्सना केन्द्रत नं स्थापना ज्वी धुंकूगु दु । अनंलिपा वर्माया विभिन्न ध्यान गुरुपिं नं नेपाः बिज्याना शिविर सञ्चालन याना बिज्याय् धुंकुगु दु । गथे—महासि सयादो, गीयन्काजी, ऊ सुन्दर सयादो, ऊ. पण्डित सयादो, ऊ. ज्ञानेश्वर इत्यादि ।

वस्पोल दो पञ्जाचारी गुरुमाँयापाखें ध्यान याःपिन्सं ध्यानया भचा सवाः थुल । हानं अप्पो अभ्यास याय्गु इच्छा प्रकट यात । उकें वस्पोल गुरुमाँपिन्सं वर्माय् महासी भावना केन्द्रय् वना ध्यान याः वनेगु सुक्काव विद्या बिज्यात । उगुकथं हे २६ म्ह छगू टोली वहे दैय् वर्माय् ध्यान याः वन । लच्छि तच्च नां दम्ह विपस्सना गुरु महासीसयादोया महासी भावना केन्द्रय् विपस्सना अभ्यास याना वल ।



वसुपोलया गुरुमूर्तिप नाप
दो. पञ्जाचारी (बश्वी), दो. सुखाकारी (जवे)

बि. सं. २०३७ साले नेपाःया सुदूर पश्चिमय् वंगु भीषण भूकम्पं पीडितपिनिगु सहयोगया लागी धर्मकीर्ति विहारयापाखें १३०० जोरं मयाक वसःत मुंका प्रदान याय्गु ज्या नं जुल ।

वहे दैय् मेगु महत्वपूर्णगु घटना जुल — विश्व प्रसिद्धम्ह विपस्सना गुरु महासी सयादोया नेपाः यात्रा । वस्पोलया थुगु ऐतिहासिक यात्राया ईलय् वस्पोलपिन्त माःगु व्यवस्था नापं वस्पोलया निर्देशनय् लुम्बिनी जूगु फिन्हुया विपस्सना शिविरया आयोजनाय् धर्मकीर्ति विहारं माक्को ग्वाहाली याय्दया लय्ता वोः । धर्मकीर्ति विहारय् वस्पोलयात अभिनन्दन व वस्पोलयापाखें विपस्सना भावनाया विषय गहन व विस्तृतरूपं बिया बिज्यागु उपदेश नं लुमंके बहः जू ।

श्वहे दैय् नेपाः काःम्ह मेम्ह ध्यानगुरु गोयन्काजुयात नं धर्मकीर्ति विहारय् स्वागत व वय्कयापाखें नं प्रवचन कार्यक्रम जुल ।

बि. सं. २०३८ साले बर्माया हे नां दंम्ह धृतंगधारी पूज्य तंपुलु सयादोयात विहारय् स्वागत याय् दत । बर्माया नां दैपि भावना गुरुपि मध्ये महासी सयादो व तंपुलु सयादोपि निम्ह खः ।

श्वहे दैय् धर्मकीर्ति विहारया आयोजनाय् १०८ म्हसिगु छगु टोली धरान व भारतया कालिम्पोङ्ग तक्क वना बुद्ध-पूजा व धर्मदेशना याय्गु कार्यक्रम सम्पन्न जुल ।

(३२)

बि. सं. २०३६ साले नेपाःलय् हे अभूतपूर्व कथं बुद्धकालीन भूगोलया मोडेल दय्का प्रदर्शन जुल । थ्वहे दैय् बर्मायापाखें नेपाःया भिक्षु संघपिनिगु लागी प्राप्त चीवर व पात्र भिक्षु संघपिन्त प्रदान याय्गु कार्यक्रम भव्यरूपं सम्पन्न जुल ।

बि. सं. २०४० साले धर्मकीर्ति विहारयात बुद्धिमाया महर्जनं येंया बसुन्धरा डोलय् छक्कू जग्गा दान याना दिल । थुगु थासे 'धर्मकीर्ति विश्व शान्ति बुद्ध मन्दिर'या निर्माण कार्य नं शुरु जुल । थ्वहे दैनिसें बैशाख पुन्हीया लसताय् रक्तदान याय्गु कार्यक्रम शुरु जुल । थ्व ज्या आः तक्कं जुया वया च्चंगु दु । थ्वहे दैनिसें शैक्षिक कार्यक्रम अन्तर्गत एस. एल. सी. परिक्षा बीपि विद्यार्थीपिन्त ग्वाहाली कथं धर्मकीर्ति विहारय् कोचिङ्ग कलासया आयोजना नं जुल । थ्व ज्या स्वदें तक्क सञ्चालन जुल ।

बि. सं. २०४१ साले नेपाःलय् २१ दै तक्क च्चने घुंका जि थःगु देश बर्माय् ल्याहाँ वना । बर्मा बने न्ह्योः थाय् थासय् विदाई समारोह याना हानं नेपाः ल्याहाँ बिज्याहुँ घका निमन्त्रणा व अनुरोध यात । बर्माय् खुला तक्क च्चना । खुला लिपा धम्मवतीया नेतृत्वय् ४१ म्ह उपासक उपासिकापि बर्मा बल—जि नं उर्पिनापं हानं नेपाः वया । नापं जिमी गुरुर्मापि दो-पञ्जाचारी व दो-सुखाकारीपिनं निगूगु पटक नेपाः बिज्यात । थुगुसी नं वस्पोलपिन्सं लच्छि तक्क नेपाःलय्

चवना विपस्सना सम्बन्धी प्रवचन व भावना शिविर तथा विज्यात ।

वि. सं. २०४२ साले नं बर्मायापाखें प्राप्त जूगु चीवर, पात्र, लाकां, कुसा आदि परिष्कार नेपाःया भिक्षु संघपिन्त दान याय्गु कार्यक्रम भव्यरूपं सम्पन्न जुल । ईलय् बिलय् जुया वयाच्वंगु थजाःगु कार्य नेपाः व बर्माया दश्वी दुगु मैत्री सम्बन्ध वत्रातुगु नापं वर्मा नेपाःया बुद्ध शासनया लागी स्वाहाली याना वया चवनेदया कन लय्ता वो ।

श्वहे साले दय्कूगु न्हू वानेश्वरया अन्तर्राष्ट्रिय बौद्ध भावना केन्द्रया लागी धर्मकीर्ति विहारं नं स्वाहाली याय्दया लय्ता वो । श्वहे साले धम्मवतीं ११ दँ न्ह्योनिसें धर्मकीर्ति विहारय् प्रत्येक बुद्ध-पूजावले कनावया च्वंगु जातक वाखें (५५० पु) कने सिधगु लसताय् विहारयापाखें वसुन्धरा डोलय् निर्माण जुया च्वंगु बुद्ध मन्दिरय् स्थापना याइगु ६ फिट तःधिकम्ह दना च्वंगु बुद्ध मूर्तिया श्रीघःलंनिसें वसुन्धरा डोलय् तक्क भव्य व अभूतपूर्वकयं जात्रा जुल । वाजा-गाजा सहितगु उगु यात्राय् दोलंदो मनुतसें भाग काल । वहे दँय् उगु बुद्ध मन्दिरया उद्घाटन नं भव्यरूपं सम्पन्न जुल । उगु थासय् लय्लय्पत्ति बुद्ध-पूजा जुया वया च्वंगु दु ।

वि. सं. २०४३ साले जापानया टोक्यो शहरय् निर्माण ज्वीगु शान्ति-स्तुपय् स्थापनार्थ धर्मकीर्ति विहारयापाखें बुद्धया पवित्र अस्थिधातु प्रदान याय्गु ज्या नं भव्यरूपं जुल ।

(३४)

श्वहे दँय् नेपाःले सम्पन्न जूगु १५ गूगु विश्व बौद्ध सम्मेलनया सहभागीपिन्त धर्मकीर्ति विहारय् स्वागत समारोह नापं रात्री भोजया कार्यक्रम नं सम्पन्न जुल । विश्वया बौद्ध प्रतिनिधिपिन्त विहारय् स्वागत सत्कार याय्दुगु, नापं नेपाःया बौद्ध गतिविधि व विशेषं अनगारिकापिनिगु छगू विहारया परिचय वय्कःपिन्त बी दुगुलीं सन्तोष ज्वीथाय् दु ।

वहे दँय् भारतया बुद्धगयाय् बौद्ध इतिहासय् न्हापां सम्पन्न जूगु 'बौद्ध भिक्षुणीपिनी अन्तर्राष्ट्रिय सम्मेलन'य् धम्मवती नापं जि नं भाग कया नेपाःले अनगारिकापिनिगु स्थिति व गतिविधि वारे जानकारी बीगु अवसर दत, विश्वभरया विभिन्न बौद्ध निकाय प्रव्रजित जुया च्वपि भिक्षुणी, अनगारिकापि नापं परिचय नं याय् दत ।

श्वहे दँनिसें युवा वर्गयापिन्त बुद्ध धर्म सम्बन्धी विशेष तालिम कक्षा नं शुरु जुल ।

बि. सं. २०४४ साले नं फुकथं न्हावलें थें विभिन्न कार्यक्रम याना वया च्वता । विशेषं श्व दँय् बैशाख पुन्हीया लसताय् माध्यमिक विद्यालय स्तरिय बौद्ध चित्रकला प्रदर्शनी सम्पन्न जुल ।

अथे हे ताइवानया बौद्ध गतिविधि व विशेषं अनल्यता च्वंगु भिक्षुणी परम्परा सम्बन्धी नं जानकारी काय्गु कथं धर्मकीर्ति विहारया छगू टोलीं ताइवान भ्रमण नं यात । थुकें अनया बौद्ध विहार व संघसंस्था नाप नं स्वापू दत ।



धर्मकीर्ति विहारे बौद्ध प्रदर्शनीया उद्घाटन

थुकथं नेपाःया बुद्ध शासनया ज्याय् थःम्हं मती तथा वयार्थे स्वाहाली वी दया जितः तस्सकं लय्ता वी ।

न्हापा व आः

जि नकतिनी नेपाः वयावले व आः थन यक्को परिवर्तन नं खने दत । अबले बुद्धया शुद्धगु शिक्षा गवले न्यने मनंनि धाःपि नं यक्को हे दुगु खः । भन्ते धैपि स्वय् मनंपि, 'भन्ते' धाय् मसःपिनं यक्को हे दुगु खः । अज्जला भिक्षु अनगारिकापि खनीबले श्रद्धा तइपि स्वयानं 'भन्ते-भन्ते धाल, जाकि हेका काल' धाईपि नं दुगु खः । लय् वनेबले 'बुद्धं शरणं गच्छामि' धका गिजे याना हइपि नं दुगु खः । 'ज्या याय् अत्सी जुया पवना नइपि' धका धया हइपि नं दु ।

इच्छा दयाःनं दान याय् मसःपित यक्को दु । उमित दान-धर्म याय्गु, आदर गौरव तय्गु तरीका वांलाक स्यना विया—उपिनं लय्ताः, अथे सया वःगु खना जि न लय्ताः ।

अबले जातपात नं तस्सकं कट्टर तिनी । भिक्षु, अनगारिका धयापि वयागु-ध्वयागु लहातं नइपि धका गृहस्थी-पितीगु भूतुली द्रुत सकाः, जिमिसं नयागु चिप काःबय् छाःपिनं यक्को कम तिनी । क्वेया जातयापिन्त सःता चिप काय्कीगु । उकेसनं, बर्माय् ला चिप-निप धयागु हे मद्दु । थन वयावले चिप धइगु हे मस्यू । चिप-निप धाइबले मथू व तस्सकं मछिना वइगु । गथे याना ध्वीकेगु धयार्थे छकः निकः दिक्क नं ज्वीगु । चिप धयागु ध्वीकेत प्यला-न्याला वित ।

(३६)

अथे हे थन न्हापां बयाबले जित्तः नय्गु-त्वनेगु तस्सकं मिले मजूगु, चःबि मदुगु, फोहरगु खना तस्सकं थाकु, दुःख ताः । न्हापां न्हापां नेवाः भाय् नं ल्हाय् मसःगु नापं मिसापिन्सं धर्मं प्रचार ज्या याःगुलिनं समस्यात वया वन ।

थुकथं न्हापां न्हापां थाकुसां बुद्ध जन्म जूगु देशय् च्वने दत व थन बुद्ध शासनया लागी ग्वाहाली याय् घैगु मन याना सह याय्फु व मन बःलाना वोः । थनया हिमालय् पहाड खनीबले नं मन याउँसे च्वना वोः ।

नापं बर्मा व नेपाःया दथ्वी यक्को समानता नं दु । नेपालीत व बर्मीतय् ख्वाः अथे अथे हे च्वं । नेवाः भाय् व बर्मी भाय्या तून नं अथे हे च्वं । पहः चहः नं मिले जू । थुपि खँ याना नं नेपाःले च्वने यक्को अःपुल ।

आःला थुपि थाकुगु अवस्थात यक्को हे मदे धुंकल, यक्को परिवर्तनत वय् धुंकल । थौकन्हे बुद्ध धर्मया वारे यक्को कनातय् धुंकूगुलि थुयावोपि मनुत नं यक्को दत, श्रद्धादुपि व श्रद्धा तय्सःपि नं दत, व्यवहार बांलाके सःपि नं दत । दान-शील पालना व ध्यान भावना अभ्यास याइपि नं यक्को दया वल । थुपि फुककं खनीबले मन न्हावलें लय्ताः । थुकथं हे बुद्ध शासनया प्रगति जुजुं वनेमा, व थ्व ज्याय् थःम्हं नं ग्वाहाली याना च्वने कय्मा घैगु आशिका याना च्वना ।

२४ दँया थ्व जिगु अनुभव च्वया च्वनागु हे बुद्ध कना विज्यागु ३७ गू वोध्यङ्ग मध्येगु छगू वीर्य बोध्यङ्ग

कन कन वृद्धि याय् फय्मा वैगु मती तथा खः, यक्को ज्या
 याय् धुन धका फुइं याय्त मखु । २४ दें तक्क धम्मवतीयात्त
 धर्म प्रचारया ज्याय् ग्वाहाली बिया, इव ज्याय् ग्वाहाली
 ब्यूपि दातापि सकस्यां कुशल चेतना वृद्धि ज्वीमा वैगु मती
 तथा व पूज्य शुशोभन भन्ते नं नेपाः वया छु छु ज्या याय्
 धुन बःगु अनुभव मेपिन्त नं कना ब्यूसा ज्यु धका अनुरोध
 याना बिज्यागुलि नं खः ।

शुद्धगु धर्म बःलाना वनेमा ।

Dhamma.Digital

सुवर्ण रजत उत्सव

सन् १९२४ साले बर्माय् जन्म जुया बिज्याम्ह वस्पोल मा. गुणवती १२ दै दुबलै अनगारिका प्रव्रजित जुया बिज्यात । बर्माय् बुद्ध धर्म सम्बन्धी अध्ययन क्वचाय्का नेपा. लय् बुद्ध शाशनया प्रचार प्रसार ज्याय् ग्वाहाली बीत नेपा.या 'योम्ह म्हाय्' धम्मवती नापं सन् १९६३ (बि. सं. २०१९) साले नेपा: बिज्यात ।

२५ दै म्हावन्सिं वस्पोलं नेपालय् बुद्ध शाशनया प्रचार प्रसारय् यक्को ग्वाहाली व तिब: बिया बिज्याना च्वंगु दु । यक्को समस्या, थाकुगु व म्छिगु अवस्था व:सां फुकक्यात मुमुमुसु न्हिला सह:याना, अपार मैत्री व करुणां त्याका:, गवलें हे अत्सी मचासे वस्पोलं नेपालय् बुद्ध शाशनया लागी त:धंगु गुण व देन बिया बिज्यागु दु ।

वस्पोल प्रव्रजित जुया बिज्यागु ५० दै दुगु, नेपा: बिज्यागु २५ दै दुगु व वस्पोलया ६४ गूगु जन्मदिना लसताय् सुवर्ण रजत उत्सव न्याय्का वस्पोलया दीर्घायु, सुस्वास्थ्य व सफलताया कामना याना च्वना ।

- धर्मकीर्ति विहार
- धर्मकीर्ति बौद्ध अध्ययन गोष्ठी
- 'धर्मकीर्ति' बौद्ध मासिक

पुष २३, २०४४